



UNIVERSITÄTS-
BIBLIOTHEK
PADERBORN

Universitätsbibliothek Paderborn

**Antonii Mariae Gratiani A Burgo S. Sepulchri Episcopi
Amerini De Vita Joannis Francisci Commendoni Cardinalis
Libri Quatuor**

Graziani, Antonio Maria

Parisiis, 1669

Cap. XVII. De abstinentia ejus.

urn:nbn:de:hbz:466:1-9616

nem subiturum, siquos non læserit, iis satisfacere, eorum affectare gratiam videretur: nec ullam excusationem aliquâ culpæ suspicione vacare, & culpam qui præstant, excusari non debere. Nec eum constantis, ac rectæ mentis fiducia fefellit; uterque enim Rex, ut veritatem ferè dies appetit, fide ejus perspectâ, & litteras ad eum reconciliatæ gratiæ pignus postea dedit, & Rex Hispaniæ Apostoli Philippi in Phrygia pro fide erga Christum Deum interfecti os brachii, ad templum, quod ei Divo ædificabat, ornandum, sanctiusque è reliquiâ corporis ejus reddendum, dono dari sibi à Commendono postulavit. Eam ipse è Germania ex æde Matthæi apud Treviros de sacerdotum, qui fano præerant, voluntate detractam in Italiam cum aliis multis attulerat, & petenti Regi argenteâ inclusam thecâ in Hispaniam perlibenter misit, à quo quidem rite, atque castè suscepta suo in templo reposita est.

De abstinentia ejus.

C A P U T X V I I .

UT sui minimè profusus, ita alieni abstinentissimus fuit. In frequentibus legationibus, quas, uti docuimus, pro Republica obivit, cùm veras innocentiae, atque integritatis laudes externis nationibus, quas infatigabili cursu peragra-

vit, ostendit, tum maximè abstinentem in omni re non se solùm, sed suos etiam præstitit. Cùm ampla illi, latáque multarum rerum potestas, & major quàm pro more propter spectatam ejus fidem, & diligentiam ferè permitteretur, hujus vſus potestatis ita ab omni semper quæstu abfuit, vt nullus à quoquam teruncius cujusvis rei diploma auferente insumptus vñquam sit, ne pro scriptura quidem, atque opera. Ac si quando res cogere videbatur, ne neglectæ legis multa remitteretur, eam ipse mulctam aut templis, aut egentibus esse jubebat. Siquidem suorum accepisse quicquam ab vlo provincialium quamcumque ob rem comperiisset, statim cum ignominia domo exigebat; nec minùs iis irascebatur, qui dedissent: magnam verò ab eo gratiam inibat, qui delatum ad se donum rejecisset, idque ipse pro suis facultatibus remunerabat. Quâ disciplinâ est consecutus, vt & amarent eum sui, & reverentur, & existimationi ejus perinde, ac suæ studerent. Cujus rei experimentum, fructumque perjucundum aliquando cepit. Provinciâ decedens vſus in itinere hospitio est Archiepiscopi cuiusdam, fortunæ viri amplissimæ, & copiis, & opibus magnis præditi, sed qui senserat se Commendono suspectum, quòd parum sincerâ fide Catholicæ religionis partes tueri, conjunctiùs, & amantiùs cum hæreticis vivere, quàm Archiepiscopum deceret, diceretur. Eò impensiùs huic tegendæ, aut abluendæ famæ, hospitem eum magni-

ficè, ac splendidè acceptum omnibus humanitatis, & comitatis officiis percoluit. Abeunti cùm non solùm ipsi argentea vasa magni ponderis obtulisset cum pertinaci obtestatione vt acciperet, sed familiaribus quoque ejus singulis prō cuiusque fortuna munera eodem tempore dari jussisset, nemo inventus est qui acciperet, ne co-ci quidem, aut vltimi ministrorum. Ea res Com mendono oppidò perquām grata accidit lato respondisse institutis suis mores omnium suorum, nec ambitiosi hospitis largitioni cujusquam cupiditatem patuisse. Atque hujus ipse continentiae permulta, & magna documenta dedit, & qui locupletare se nec injusto, nec insueto aliis compendio potuit, gloriam, quām divitias ferre è publico ministerio satius habuit. Ego ne, quod longum esset, singula enumerem, duo tantū exempla subjiciam. Cùm in Germanica legatione, in quam Episcopus ad Concilium indicendum est missus, ad Joachimum Brandenburgensium Regulum, vnum è septemviris, qui suffragiis suis Cæsarem creant, & ipsum Lutheranā doctrinā, factio néque imbutum venisset, vt suprà docuimus, summóque apud eum in honore fuisset, discedentem ille regiā munificentia prosequi cupivit. Nam equos eximios quatuor, varii vñs argentea vasa, atque in his ex argento item, sed auro superinducto pateras binas notabilis magnitudinis, ac ponderis, Germanico factas opere, quibus illi solemnibus potant dapibus, horologium sum-

summi artificii, quo magnopere Germanorum ingenia gaudent, excelluntque, adjecit, & aureos nummos quingentos, præfatus haud ignarum se quantis sumptibus qui procul ab domo peregrinantur, hauriri necesse sit. Ex his Commendonus nihil accepit, atque contendenti Regulo, & pudori sibi sua spreta munera fore querenti non cessit, professus rem modò ab se remitti, gratiam rei perlibenter accipi. Cùm item è Polonia novo Cardinalatûs honore insignis in Italiam proficeretur, Augustus Rex indecorum sibi existimans, si virum eâ dignitate è Regno suo descendere nullâ suâ liberalitate vsum pateretur, per Petrum Miscovium Episcopum Plocensium, vnum è Poloniæ proceribus, ac tum principem apud eum gratiæ locum obtinentem, diploma ad eum Regiis signis, atque chirographo consignatum misit, quo ei annum vectigal duorum millium Ungaricorum duabus solvendum pensionibus constituebat. Quo quidem diplomate testabatur Rex id quod res erat, non sibi ante eum diem studium bene, ac largiter merendi de viro tali defuisse, sed ipsum obstatisse voluntati suæ omnia repudiendo. Quod tum quoque contigit. Nam Commendonus, quamquam ei pro novæ dignitatis splendore pertenuis, atque angusta res esset, tamen gratias simul, & diploma ad Augustum referre Miscovium jussit, pulchre quidem mereri, sed pulchrius contemni Regum dona existimans. Sed Rex de eo litteras ad Pontificem Maximum de-

dit, nec destitit, donec Pontificis adactus imperio Commendonus munus Regium recepit. Ita factum, ut & liberalitas Regis, & Legati abstinentia egregiè constiterit. Hæc, atque alia hujusmodi multa abstinentis, atque integri animi documenta eò majori admiratione accepta, celebratique sunt, quò nos antea graviùs & cupiditatis infamiam apud exteris nationes premebamur. Nec parva in iis alienatarum gentium culpa residere creditur, qui ad eas in fide, atque in antiquæ sanctitatis officiis continendas missi, ita se turpium quæstuum, atque avaritiæ sordibus contaminarunt, ut Romanum nomen in magna acerbitate, atque invidia externis gentibus posuerint. Quæ maximè vnius virtute, atque abstinentiam deleta macula est.

*De habitu corporis, & valetudine,
& morte ejus.*

CAPUT XVIII.

STATURA fuit justâ, erectâque, & minimè tardo incessu, facie decorâ, magnâmq[ue] gravitatem, ac dignitatem præferente, colore subfuscō, sed florido, & ferè rubentibus genis, barbâ, capillöque denso, & admodùm nigro; nigris item oculis, vegetisque, & acutâ, ac celeri acie; naso paulò eminentiore, & qui subridenti sponte, vt notari posset, moveretur: aures item mo-